

55638
0422


v.18

丘墓文

記言別集
卷之六

BERKELEY
LIBRARY
UNIVERSITY OF
CALIFORNIA

五廿



BECKLEY
LIBRARY
UNIVERSITY OF
CALIFORNIA

記言別集卷之十九

丘墓文

贈判書許公墓碑銘

公諱完字子固姓許氏本孔巖人孔巖之許自
始祖世有名公鉅人冠冕相傳至公之世七百
年號為大姓三世祖澣 贈吏曹叅判大父昀
父芭皆 贈戶曹叅判母貞夫人京山李氏隆
慶三年我 宣祖二年公生生而卓異其戲嬉
亦不與凡兒比比長從堂叔父岳麓公學聰睿
善記誦長於筆法然好才略不屑屑為章句之

學與一時名武人柳斐成佑吉爭射御皆曰能
二十五擢武科戍南邊水軍統制李舜臣一見
竒之待之異於列士許以為將帥才戍還授宣
傳官以才望選備局郎柳相國成龍條上築城
便宜凡累千言公應口輒書無所難相國後見
之私第授東國地圖勉之曰為將者知地利阨
塞則屯守制勝在此薦於上以不次除南平
縣監四年以母憂去既卒喪復為備局郎累遷
都摠府都事經歷甲辰為端川郡守時虜數寇
邊殺我邊將上命北道節度使出兵擊之公

與虞侯佑吉素善為前鋒既深入後軍為虜所
圍急還救之攻破賊得全師以還上特賜弓
劍甲冑陞折衝將軍移茂山鎮僉節制使以拊
虜三年入為訓練中軍癸丑為湖西水軍節度
使軍士思之不已軍部啓上還拜中軍甲寅
為湖南水軍節度使當光海政亂不樂居散地
者九年仁祖既反正以公得士卒心召拜中
軍尋以水軍節度使復出湖南一年忤權貴入
罷丁卯虜大入寇薄畿甸上出幸江都復以
公為中軍一軍皆喜得將至刻石頌之寇退賞

羣臣從上勞公進嘉善大夫為嶺南右節度使兼晉州牧已巳移會寧都護府使虜每與我互市易貨解弛無心禁制公嚴約束作外門禁虜令騎者毋得入門虜憚之皆下馬不敢慢公嘗出獵暮還虜方據館府兵僅數百公令軍士從東門入易服出西門復入東門循環以示虜虜驚曰府兵何多也畏憚之殊甚又以治理賜表裏三年陞南道節度使或以為前時當廢毋后召文武百官問之某與負罪者一辭得罪長子崱上疏訟之發王府諸上議然後事得解復

出將湖西水兵丙子改嶺南左節度使冬虜大
舉東創京城不守急上出幸南漢南漢受圍
四十餘日公率步卒萬餘勤王誓死泣下以激
士卒心士卒皆思死力至雙嶺距南漢二十里
公約與右營朝日飯士卒進至南漢下按部從
事都敬俞者妄自用素失將士心督諸軍朝未
明而進兵伐賊公曰士卒遠來天寒凍飢迫之
與鬪必無幸矣敬俞不聽先斬右營軍官以劫
衆公曰天也大事去矣遂發兵虜伏兵大起兩
營兵皆敗沒公與賊搏戰士皆殊死戰麾下壯

士皆死賊既乘勝公拔佩刀自刎死之丁丑正月三日也敗報聞城中將士皆出涕曰雖不破賊能殺身循國忠臣義也 上命追爵資憲大夫兵曹判書兼知義禁府事遣禮官 賜祭錄用其子孫敬俞械繫治之既得釋仇殺之公在軍中遣蒼頭與二子書言決死意不言家事二子入賊中收公屍以成禮旅葬忠州三年改葬清州之青川松面公性雅謹待士大夫有禮治軍旅一不以卑賤而蔑之親近而私之以此得士卒心官位已貴常在藩鎮未嘗營立尺寸曰

受國大恩當以死報 殿下何可捐廉恥為子
孫計也居家大夫人已八十有二兄二妹一懽
愛克順視諸子猶子宗族歸心教子弟讀書為
學禁止奢華自處如儒士恥不義如恥汙辱雖
親戚必絕避形勢如避機穽雖素所交友必謹
癸亥中興之後功臣貴人皆公舊遊必折節下
之其雅重之如此貞夫人趙氏籍平壤我 太
祖功臣平壤府院君浚之後也夫人莊敬慈惠
篤於親戚仁及妾媵平生恤人之急不計有無
至性如此常恨當亂離父母歿而葬不得盡於

禮也終身不御華美日誦古人嘉言善行以教
子孫如奉先居家之節皆可為子孫法九十二
卒辛丑正月十八日其三月祔葬青川二子崙
崙崙生負有文行亂後不復應舉因落南不幸
早世崙縣監女四人壻都事魚夢濂奉事柳仁
培士人元玘縣監南斗夏崙生墳塋墩皆進士
女一人壻縣監李敏思崙無子以兄子塋為後
有一女壻進士權德任內外子孫三世三十餘
人銘曰

明慎師律推誠愛士士卒思死仁也潼關之報

率勵壯氣破虜全師勇也昏王泯亂穢濁盈釜
介潔不污廉也逢時不利誓不辱名自殺以明
決也

姜山陰墓碣銘

公初諱遠後改連字汝達別號光齋姓姜氏本
晉陽人高麗相著七世孫也父應伯大父彥弼
母咸安李氏壬辰之亂以節婦旌表其間事在
三綱行實公嗜古人之學從先生長者遊篤學
修行能樂善於人而嫉惡於己令聞不已萬曆
四十六年選博士弟子當光海政亂恥之潔身

不出 仁祖既反正鄉里相賀公獨愀然不樂
相國李文忠公聞之歎曰不亦善乎誠君子之
心也公居太學鄭公曄時為大司成聚諸生選
於多士以公通讀近思錄講論良久嘖嘖曰多
士中一人云明年選學士李文忠公薦公行誼
為 光陵叅奉及上追尊私親立禰廟以慶設
科取士公不應曰縱不言心不然違心覓科可
恥也後為活人別提禮賓直長義禁府都事再
為宗簿主簿出為奉化縣監公居官好清淨持
法無私邑豪蕪并者多憚之故相李敬輿為按

使受人之言因考績黜之慙悔曰吾從此有咎
即移傍邑供給行李公長於我十年余敬事之
相知最深公平生不以得失易其操又不枉道
而求譽性至孝其事親唯恐一事不得盡於事
親之心鄉黨皆稱賢及父歿公已六十其居喪
之節不以衰故小懈也後林公壇為吏曹聞其
賢特除山陰縣監忤於大臣臺諫論之竟以老
病之公自此益不樂仕宦因落南 顯宗五年
命年八十以上官六品者皆賞資公以八十陞
通政仍授軍職副護軍明年乙巳正月歿於西

原其三月返喪衿陽故山至十月乃葬宜人安氏合葬宜人中古相貞愍公瑋之五世孫也少於公一年先公十五年六十五沒賢有婦德生四男一女男錫行錫明錫亨錫平錫亨進士壻儒生韓相重銘曰

嗜古篤行以至壽考敬忠之勸孝悌之報

贈都承旨崔公墓碣銘

公諱東弼字正則姓崔氏朔寧大姓六世祖恒本朝名臣謚曰文靖曾祖贈司憲府執義濟哲祖贈左承旨繼宗父贈吏曹叅判朴母

丹陽禹氏高麗名臣仁烈之後也嘉靖四十一年壬戌公生比長受學於大司成禹公性傳禹公陶山弟子而於公為外家從祖兄弟也十七禹夫人歿萬曆十六年二十六補國子進士後四年先府君歿既除喪擢甲午庭試初授成均學諭三十五年丁未以獻納移掌令忤用事者貶鏡城府判官後為安邊安邊舊俗鬻魚鹽饒稷麥不務種稻公至築堤穿渠興灌溉之利辛亥為司諫任叔英直言對策當削科公在諫院力爭乃止乙卯廢主大興作治宮室術士李懿

信言遷都事公引秦漢古事歷陳利害癸丑復
為司諫有安衛上變事公又極言冤獄無辜諸
囚皆得釋一時多之時鄭造尹訥首發母后
別處之議公始貳於此見世道大亂謝病歸田
里後累為司諫輔德皆不就或謝恩而去不復
與朝廷事矣甲寅六月庚寅公歿年五十三葬
南陽治西德冬音後九年癸亥仁祖克大難
公追爵承政院都承旨公性剛直守正好儉素
不事營為坦然於喜怒不以纖芥介意平生不
肯循俗俯仰卒不大顯亦無感憾於窮而樂飲

醉自娛其銘曰

捷徑而顯不如直道之窮書諸石表幽宮

貞夫人沈氏掌令源河之女籍青松庚申男薦
為平康縣監奉養於官所其九月歿年五十四
祔葬同原薦官上司憲監察胥四人左議政元
斗杓縣監李尚節朴稹咸陵府院君李漸廢出
男二人葩蒙薦廢朝貴臣柳希奮壻也生五男
一女男栢年判官次碩年正郎次永年翼年皆
生負次奎年壻許昌庶出男二人參年斗年女
一人壻崔球

節度使裴公墓碣銘

公諱時亮字子明姓裴氏本星山人中世有大
司諫規規生閑閑為左司諫閑弟閏為正言父
子兄弟皆入諫院閑子允詢進士始居金山今
五世云大父仁範以善行聞為靈山縣監父興
立工曹叅判當倭亂有戰捷功追爵左贊成大
母金氏有節婦行工曹又以孝友聞金山新下
表母子節孝之間母礪良宋氏明神宗三十
二年八月丁酉公生二十七擢武科第一人初
授禮賓寺主簿歷備局郎鍾城府判官訓鍊院

僉正都摠府經歷三水郡守乙亥以母憂去丙
子之亂起復從嶺南左節度使閔泳泳敗死公
代領其衆勤王至忠州聞事平遂罷兵歸戊
寅春為肅川都護府使其六月移嶺南左水軍
虞侯籌司以能請上還任肅川尋以不次擢
折衝將軍改關西兵馬虞侯三年拜楊州牧使
癸未冬為平海郡守乙酉以護軍兼訓練院都
正冬為湖西節度使明年秋錄寧國功臣原從
一等戊子九月復出為關西節度使三年改京
畿水軍節度使兼三道統禦使癸巳移嶺南右

節度使 上引見曰列邑形勢太重節鎮反輕
以憚壓強禦責卿乙未冬復拜訓練院都正丙
申秋特加嘉善因故爵俄拜副總管冬拜捕盜
大將丁酉正月為湖南節度使其十一月巡閱
兵馬到長水縣劇病卒年五十四 上以禮致
祭令三道列邑護喪歸葬坡州公雖武人好文
雅自守廉謹擢在列將嘗五典州府五領節鎮
田宅不加益恬退未嘗銜名矜能不媚人先撫
恤宗族人服其至誠此其舊家素所遺教然也
貞夫人靈山辛氏士人應望之女與公同年生

先公八年卒年四十七葬於坡州及葬公乃同
塋而窆有男女二人男曰命虎歿折遺有二子
長曰尚球次幼女縣監安緝妻銘曰
節孝之傳懿且惇福祿之報裕後昆

郭佐即墓表

郭公諱期壽字眉叟其先湖西之海義縣人
昭敬中以科目得仕為禮曹佐即出扶安縣監父
母皆九十餘棄官歸樂家居以為養至光海時仍
不出三十年作安宅誌四方解又有閑居諸作足
以任寬居足以警後人好林居別號寒碧老人以

壽考終男致堯為直長孫聖龜為綾州牧使曾孫
齊華方為司諫院司諫兼掌史局其弟齊恒亦進
士信乎有德之世天道之報不差有如此者云

利川府使盧公墓表

三韓之盧有二族皆貴大其一本於交河其一
出自光州今光州之盧尤盛公光州之世也諱
大河字某國初相嵩之後而倉守 贈贊成珮

之曾孫活人署別提 贈領議政鴻之孫敦寧

府僉正 贈左承旨克慎之子母德山李氏清

州牧使增榮之女嘉靖丙午十一月二十日公

生通敏多才所交遊皆一時聞人公名譽早著
伯父蘇齋相國文定時竄窮海之珍島風波險
惡道路千里公十九涉海從之學既通累舉不
中慨然歎息恥以科目發身內植益堅二十九
初筮仕為恩津義城皆有治績壬辰之亂一上
西韋公以司贍寺僉正從上上命百官有親
老者皆令勿從公以父母皆老故得私其家轉
入北關其七月謁世子於伊川以翊衛奉使
至行在所為司僕寺僉正仍為檢察使金應南
從事掌義州龍川芻糧搬運等事甲午既復命

拜司憲府監察尋出為安山郡守未久以病歸
時家奔竄關外其十二月大夫人歿既守墓三
年妻李氏歿而又寡妹無子死以大亂未定皆
旅葬博川於是有清風丹陽之命而皆不赴丙
戌先大夫歿於湖南既歸葬化寧遷諸喪旅葬
者以返公歎曰妹死而無子吾不忍後也故淑
人之葬最後遷壬寅由典簿出天安兵亂殘破
之餘初行大同法以便民列邑皆效行之及朞
以治理第一陞利川都護府使三年謝病歸後
三十餘年百姓追思不已立遺愛碑庚戌十二

月廿五日公以古阜郡守歿於官年六十五將
殮郡致祔用紋衾并邑縣監朴忠生來視殮不
許曰公平生不以奢侈為禮遂不用明年葬化
寧公服膺賢父兄之教訓篤行孝悌居處必嚴
雖家人父子未嘗見其惰容好儉素有禮讓以
為家法沈相國喜壽知公最深以公行已之正
治家為官之方一以問學為本云初娶叅判申
湛女生二女婿二人李栴金仁鳳栴進士後娶
節度使李珣女生三女二男女一人適進士許
遵一人適觀察使洪雲一人適士人李三近男

曰道立道一道一前咸悅縣監內外孫至三世近五十人

監察李君墓碣陰記

公諱以健字誠之姓李氏本慶州人中古名人
贈承政院都承旨龜之四世孫也曾大父洙仕
至郡守大父愷胤為庫令父弘業我昭敬二
十四年以持平忤於當路者貶鏡城都護府判
官明年壬辰東方大亂咸鏡道皆叛賊勢益強
二王子皆被執郡縣爭縛長吏以迎賊先府君
又為叛卒所縛降家皆陷當亂以為家全不全

不可知嘗命公以太夫人避亂窮北深處以故
太夫人得全公聞變泣辭太夫人徃從右衛將
吳應台軍中聞先府君還自賊中又為大臣所
拘持在行在所得罪而母李氏妻尹氏亂中皆
自殺云遂來先府君所上疏訟冤賴大臣救之
流吉州四年 上寬赦之因寓居北青居山驛
一年先府君歿既反葬之七年太夫人歿公當
亂離憂患積苦艱難前後持喪又九年先海二
年為奉慈毀終奉歷造紙署別提義禁府都事
內贍寺直長司憲府監察既先海政亂嬖倖用

言
事公抗直不肯卑事權貴以此罷公既失職絕
意仕宦自老於臨湍為丘墓鄉故也年七十二
歿崇禎六年某月某日前夫人郡守尹克仁之
女亂中既守節死之而生二女其二壻洪謨丁
好悌好悌進士後夫人坡平尹三省之女又賢
有至性恩義信於僕妾前夫人壻洪謨夫妻皆
亡有二女育於夫人以至成嫁夫人少於公十
五歲公歿八年夫人歿崇禎十四年某月某日
為六十五歲男彥茂以善行聞壻尹相彥茂之
子三人泰來泰陽泰萬泰來亦善士不幸早歿

公又有度出子二人

宣寢郎金君墓碣銘

君諱夏振字叔玉姓金氏金氏出自新羅我
太祖功臣鷄林君諱稠之後也鷄林君四世有
直提學諱千齡直提學生大司憲諱萬鈞大司
憲生左議政諱命元左議政生別提諱守仁別
提為伯父湖西節度使諱慶元之後皇祖考皇考
諱南獻皇祖考皇考皆早世妣永嘉權氏政府
舍人所之女君生未長父母俱亡祖母韓夫人
鞠之比長能自知讀書聰明介潔方正雅飭望

見可知端人正士三十三擢進士第一人自直
提學大司憲節度使三世皆以壯元顯三世而
至君又選國子壯元金氏六世壯元四世以此
君名益著後補宣寢齋郎年三十七歿君無祿
於世官止一命又不得年賢不食報不知天道
者何也孺人李氏判書基祚女也有婦人懿行
君亡哭之至於滅性有一男二女男曰夢臣女
一人嫁士人朴泰維一人未笄君有長兄始振
方為春官亞卿兄弟為知己悼君之秀而早歿
嘗言君齋郎時適祭先妣聞兄疾卒甚私歸既

攝事將返 上遣中貴人察諸陵寢未發君
聞之即不返曰已干法矣待遠理卒得罪無悔
色吾見人之情得一官則喜失一官則感君見
義明行已正不以得失動其心如此昔我直學
公簡靜以苟進為恥遺風餘教為子孫守於君
亦可見吾嘗與君論古人之學君一言即信吾
心甚喜以為聰明敏識可期於古人不幸殀折
至今追思良為慟惜慟惜銘曰

生而苟得其正殀者不為殀生而不得其正壽
者不為壽而天道之報其於善人者薄而於不

肖者厚終使禍福易施吾何咎有物者之咎

崇禎處士墓碣銘

公諱是楹字以承姓金氏其先出自新羅新羅至敬順王國絕有王子錫事高麗食邑聞韶子孫為聞韶人自太子詹事龍庇見於譜牒十一世有生負璫於公為三世祖祖察訪守一父進士澈叅判浦之弟而為伯父司成克一之後母善山金氏察訪宗武之女大司諫就文之孫觀察使柳仲郢之外孫也萬曆二十六年二月十一日公生少聰明嗜學以才行發聞卓然異等

聲名重於江左自丙子大亂之後讀書不出四
十年既博於百家專以經學為本卜居陶淵從
泉石之樂自號陶淵其里名大瓢亦曰瓢隱樂
間暇吟哦自適晚年不復作詩遣興曰多言害
道與學者言舉其大義令之自得而已亦不役
志於文字之末也好禮哀梓編類書未成謙抑
不居著述迺止永嘉都護林壇後推薦之為陵
署郎不起又後廩使連以文學耆德累薦於朝
不果召上之十年公七十二嘗無疾一日鹽
浴更衣與親舊諸生會於山齋歡與語終夕朝

則悠然而化七月十三日甲辰也會哭者百餘人既殮歸殯於家其九月丙午葬于臨河東松石山南麓公嘗言我死書吾墓曰崇禎處士之墓可也門人承文博士金學培書銘旌曰崇禎處士之柩而葬焉公平生尊信經訓居處必有禮言動必有節嘗讀中庸曰聖人心法在此沉潛積學既用力久而見理益明踐履益篤勉人必以整容貌謹言行辨義理審取捨正出處之義也與人忠愛信順敦厚樂易至臨利害辨邪正辭氣截嚴使人肅然敬憚愛而知畏儼恪有

則充然德全者也謹喪祭篤恩義蓋其家法已
立而又其居家細節金學培博士論撰言行記
盡矣公初娶豐山金氏持平奉祖之女有懿行
四十一歿生六男四女男邦烈邦衡邦杰邦杰
邦贊邦照烈生負杰縣監壻權克中金輝世權
克正鄭自固後娶英陽南氏處士振維之女生
二男三女男邦顯邦謙壻金宗汲李俞吉季女
未嫁八男七女子孫百餘銘由

懷道遠引碩人之貞安樂壽考碩人之亨秉德
守正碩人之名

贈判書朴公墓碑銘

贈判書判書朴公昨字泰熙本密陽人大父務
安縣監榴以壽考秩從二品父 贈漢城右尹
宗秀母原州元氏高麗政堂文學松壽之後也
我 恭憲初 文定垂簾時有士禍舍人丁璜
竄巨濟公年尚少從而受學既才藝早成初為
親應舉親歿則不復求舉居家有禮令聞日多
一時南中士多推許賢之我 昭敬年二十五
年有倭寇國大亂兵革八年避亂丹城三年客
死而葬乾坪年五十五公初娶載寧李氏生一

男一女男震英 仁祖世以平山都護府使為
西海道防禦使振武原從追爵判敦寧府事推
恩公至上卿壻縣監辛砮後娶昌原黃氏生一
女壻郡守李達判敦寧少讀書業文學當大亂
慨然以騎射發身而能守先人之教臨亂與人
守死不背功多而不伐其勞好禮讓教家言必
稱先訓蓋其賢有自而公之教子孫亦可表於
後世者章矣夫人李氏長於公二歲而公三十
八時歿黃氏少於公十四歲而寡居十八年五
十八歿今公死之後八十八年乞銘者判敦寧

言言集卷之十
子儒生朴亨龍也有長兄世龍早歿有小弱弟
八人以武科得仕者二人庾龍粟浦水軍權管
任龍積城兵馬都尉其銘曰

良善無祿天道必待後人是勗是篤

韓司果墓碣銘

韋布生韓德亮為其先府君乞銘於穆曰吾上
黨之韓族世舊遠自始祖蘭至吾先人二十世
其間中贊康右政丞渥清城君公義文敬公脩
領議政尚敬文襄公世義最貴文襄之後牧使
欽副司直亨俊進士璿嘉善彥恂至吾先人為

五世吾先人諱潛字德源又字得源才藝早成
累試不利以文襄功蔭授西班牙禦侮將軍行忠
佐衛副司果恥名不著自屏海上好樹藝與人
無競口不言人過失簡潔雖親戚交友官顯則
不見或勸之仕則笑曰樊廬蔬糲吾分也居家
有法祭祀必潔誠器品有常式祭器不雜燕器
使僕隸有序分職授事量入為出歲饑日為食
贏餘以待饑者塲有遺粒必拾之戒之曰天物
不可踐也二弟洧洛洧以武得官洛最幼與之
同衾而寢懽愛無間不幸早歿丙子之亂其孤

子被擄以亡弟之故尤悲憐泣思常默禱孤卒
得歸人皆曰至誠之感也有姑寡居無所依事
之三十年歿而其葬祭一視親母平生言必信
行必敬居處必靜淨寫字必楷正此皆不肖學
而未能者也前娶八溪鄭氏務功郎鑛之女而
無子後娶驪陽李氏宣務郎友廉之女生不肖
先人隆慶五年十一月十一日生崇禎十年四
月六日歿年六十七葬安山海上三閑洞亮早
失先人略舉耳目所睹記煩長者以過譽溢美
貽先人之羞亮大懼也余應之曰不亦善乎吾

聞古人尚慤其道不言而敬忠以勸子之先君子恬慤自守居家信順以篤忠愛盖有隱德高行不見知於世者耶銘曰
忠而敬恬而淨不求不競

玄吉州墓碣銘

前豐川都護府使玄侯太始以其先大夫吉州公之葬屬余為銘余不得辭謹叙其族世系官爵姓名及其事終始如左公諱某字

姓玄

氏其先本順天人玄氏見於高麗自版圖判書忠守始大其子佑為賓客寺事賜紫金魚袋佑

生仁亮為忠清道水軍節度使領管軍招討營
田事三世著顯五世至積福我昭敬時以行
誼得仕為殷山縣監於公為皇考及光海時以
少子某貴為節度使故例贈吏曹判書妣蔚
珍張氏贈貞夫人公以武舉顯初授宣傳官
歷定州判官都摠府都事經歷又歷治甕津松
禾寶城郭山仍陞折衝將軍又為高嶺鎮僉節
制使金海都護府使吉州牧使兼南北道守防
禦使自壬辰以來國家多事辛卯公丁內艱居
廬而起復有松禾之命於是當兵革之際飢饉

荐至公板蕩之餘能調兵賑飢名譽賢於西州
歷守邊邑積勞遷秩至正三品平生以官為家
未嘗營立產業為子孫計而又其居喪之節孝
友之行多稱於士大夫而鄉黨共禮賢之公既
年老以丘墓之寄家於延安之年七十九卒既
卒以宣武原從追爵從二品 贈嘉善大夫兵
曹叅判夫人蔡氏趙氏皆 贈貞夫人趙夫人
故禮曹叅判諱某之孫合葬於麻田分石山東
麓已向為兆蔡夫人既早卒而趙氏共厨四十
餘年子孫滿前先公一年卒公有二男三女男

豐川最長而其次太和早歿女一人適成均生
貢尹炯一人適趙仁輔一人適李以晉惟嫁為
尹氏婦者蔡氏出也銘曰

惟孝友樹已厚壽而通報且豐崇四尺之封惟
大夫之宮

李判校墓碣銘

公諱後奭字君保系出宗室我成宗諸王子
益陽君懷之四世孫也公聰明嗜學少師事李
英彥先生學詞賦於農圃公農圃公者母鄭夫
人之叔父文孚也十三四始以才學發聞農圃

公亦嘗稱許以為高才。仁祖二年選太學七年。上韋太學選士公登丙科第一人及第補成均學諭累轉學錄學正甲戌例陞典籍遷司憲監察乙亥改刑曹佐郎丙子為良才察訪丁丑有母憂居喪守墓三年己卯除黃州判官一年以疾去百姓追思不已辛巳光海君遷濟州死。上命喪用王子禮公以禮曹正郎從曹長涉海以喪返壬午拜成均直講癸未復為禮曹甲申兼記注官其年有父之喪哭之幾滅性丙戌為兵曹正郎己丑為青松都護府使有德政

碑甲午為右通禮尋改濟用監正後連補外為
寧海鳳山政稱廉平戊戌為左通禮庚子復出
蔚山修舊政革弊事凡十餘條治大盜當賞公
固辭不受連歲大無發倉賑之德之者皆曰當
有陰德之報以荒政不舉罷民心皆惜之甲辰
為尚衣院正丙午以左通禮改承文院判校兼
編修官卒立朝四十年不樂聲勢沉於下僚常
曰祿仕者盡於官守足矣不以官小或怠嘗事
親必躬執饋養不任僕妾姊妹兄弟子之孤寡
者視之一如父母之視之也宗族歸心焉平生

以愛物為心謙恭篤厚教子弟一以自多為戒
口不言人之過而見人之嗜利附勢若將浼已
廉潔自守不以拓落為恥曾大父龍川君壽閑
大父仁城君倣父平林君祉胤母縣夫人鄭氏
廣興奉事文升之女公生於明神宗萬曆二
十一年正月十四日歿於上之七年三月十
八日年七十其閏四月九日葬于砥平蘆洞南
向之原先兆之次淑人李氏籍龍仁副司果聖
望之女男瑞奎壻成均生負李國憲銘曰
不數數於通不戚戚於窮多而不有約而不誇

鳴呼有德者之歟也歟

白處士墓表銘

君諱瑞羽字雲程姓白氏本隋城人其先多顯
者大父天民叅議惟讓之諸子也當已丑獄其
家皆滅死因落南居晉之南境至君為三世父
弘悌宣祖世以義特聞除軍資奉事母李氏
籍咸安父大壯萬曆四十一年二月丙申君生
學讀書能夙成弱冠遊泮宮泮宮士多愛之者
奉事丈嘗語我曰吾兒讀書嗜善可教吾深愛
之君佳士與人無表襮以為人寧負我我不負

人思欲必忠必信平生好言論重儒術聞人之
善慕之如嗜欲君累舉不中嘆之曰得失命也
不幸早失先人雖得一命無以為悅遂棄舉子
業恬淡閒暇嘗與我相從入海觀虹門九井遊
合浦同登月影臺君晚年卜居州西峽中從山
水之樂漁釣上之八年十二月戊戌年五十
五死壽雖不終可謂善人之善終者也吾年老
知舊日亡固知死生之常悼長逝者為之愴然
疚心亦自悲也君初娶康津安氏縣監克家之
孫也生兩章女一人壻鄭萬齡後娶谷城禹氏

無子又有庶出子二人皆未成童銘曰

篤於親仁見善若得於其身可稱於後人

贈吏曹判書趙公墓碣銘

公諱宗道字伯由姓趙氏咸安人五世祖旅魯
陵元年進士當世祖時遁世自守號曰漁溪
隱者漁溪三世有安陰縣監應卿以行誼發聞
見於咸州人物誌於公為王父皇考諱堰受業
於宋圭廬門下亦賢而隱於世者也明宗時
召除官不起母姜氏大司成老之孫也嘉靖十
六年二月甲寅公生生七歲能屬文十歲學於

隱君子鄭斗先生先生奇偉隱遁世莫有知者也公聰明過人於經史諸子一讀終身不忘二十二陞上舍以公薦初授安竒道察訪時日本遣玄蘇來蘇以詩試我多慢易之見公作必再拜而讀之累轉掌隸院司評因為陽智縣監繻衣以政清聞上賜表裏以獎之後累官或起或不起丁亥為金溝縣令有叛主奴托屬傍邑來訟不以曲直專以強弱為勢公不撓立決之還其主人心大服己丑邑有上變獄事多冤當捕囚公心知其無事故脫之即罷後公亦坐連

累與崔守愚先生並逮繫經冬守愚對獄卒呼
叱如奴公諧笑自若獄中為之語曰崔司畜之
呼叱趙金溝之諧笑縲紲俱忘崔守愚竟瘐死
獄中公得釋每言及守愚輒涕泣壬辰有倭寇
列郡望風奔潰賊乘勝而前公嘗至京師聞亂
南歸與正言李魯相遇慨然言討賊事約為同
死至咸陽見招諭使金公誠一大喜傳檄郡縣
即起兵金公以公為宜寧假守至則郭公再祐
已起兵於宜寧公即推與之還見金公道聞兩
京不守而車駕已過重江以為國亡矣欲臨江

自投而死之金公曰不可道說不可信且徒死
無益也公然之時上幸龍濟以義兵功賞公
爵掌樂院僉正改丹城縣監時當大亂之際國
內大饑公發倉賑之不足則傾私貨以繼之其
年金公為巡察使遘癘疫卒於軍公辦其喪明
年棄官歸後有安州清風之命而以病不赴丙
申為咸陽郡守丁酉賊復大舉而西公上書體
相乞全付一郡兵民以死效之遂獎率境內據
險守之已而有命守黃石公即與安陰縣監郭
公趨謀繕完城壘未幾公適咸陽皆曰守城危

又無官守可以去矣公曰吾既以死許友而賊
已急義不可去咸陽子弟初欲散去聞公之義
即從之主將白士霖曰城險賊易與耳及賊薄
城士霖夜毀城逃去城遂陷公與郭公北向再
拜而死之八月十八日也公年六十一妻李氏
故叅贊俊民之女也公知事不可為以死自誓
令妻子出去李氏曰老妾當從死義不可去也
遣其二子曰毋令趙氏絕祀也守節死之而郭
氏闔家皆死事聞上以禮賜祭初贈公司
僕寺僉正後累贈吏曹判書表忠臣同鄉人

立忠賢祠以祀之初葬黃石下戊戌改葬晉州
之召南公有至性高行事父母猶恐不以父母
之心為心仁於親戚於交友忠而每商論古今
治亂人物得失詞氣嚴正足以勵人見世道日
污飲醉笑傲以自戲自號大笑軒磊落一不以
居家生產自累柳相國成龍嘗稱之曰伯由外
若軼蕩內守堅確有烈丈夫風有子男三人長
子英海早死次英漢城陷被虜而還者也英混
最少女四人其壻權淪金夢芝盧肱鄭益乾其
銘曰

許友不辭死義也殺身以徇國節也惟義惟節忠臣之烈也

陳君墓碣銘

陳九疇字倫叙本驪陽人居積城之通溝司憲監察郁燕岐縣監漢臣宣務郎義胤其曾大父大父父三世也宣務公年高君顏色忠養人皆曰善行仁祖十四年冬有狄亂金城山峽中狄人縱兵大掠山野猝遇賊宣務公當鋒刃迫君急以身蔽之賊擊之宣務公得全而君殊而未絕三日而死垂絕亦與妻子言猶奉養數語

而已諸聚觀者皆流涕而言曰善乎孝子之心
也死而不忘其養云君死之時年四十七十五
年正月廿九日瘞之山中其三月返而葬紺岳
北麓既葬同里父老嘆息言曰不可使至行湮
滅合辭具告官事聞 仁祖命旌表其閭曰孝
子陳九疇之閭十八年庚辰也後五年甲申改
葬通溝陳氏族葬妻李氏宗室女 成宗諸王
子益陽君之五世孫也生二男曰卧龍次龍亂
中長子纔十九其次未成人宣務公哭之傷心
其明年歿其二子連有喪既卒喪之明年長子

死又三年次子死其長子娶妻未久而死無子
其妻沈氏求同姓子克諧屬其祭祀今經亂已
三十餘年孺人李氏既窮獨至老買石表君之
墓叙其事如此仍銘曰

嗚呼至行之報天之使無後嗣者命耶

海翁尹叅議墓碑銘

尹善道字約而海南人四世祖國子上舍孝貞
自戊甲以來隱居不出自號漁樵隱者生弘文
副校理衢亦已卯名人事在己卯黨籍校理生
右叅贊毅中右叅贊二男長惟深次惟幾惟深

官止副正惟幾為觀察使公副正之子而觀察
使之後子也其本生母安氏左議政珰之孫也
萬曆十五年公生聰明善學博讀經史百家如
醫藥卜筮陰陽地理無所不究二十六補國子
進士當光海時從草野上疏極言嬖倖臣李爾
瞻專政擅國議政朴承宗王后兄柳希奮忘君
負國疏凡累千言朝野大驚竄極邊慶源窮北
二千餘里地接胡以為戊申以來凡得罪流竄
怨國者持國陰事以與虜通盡遷之南邊公移
機張亦東海隅日出癸亥 仁祖既反正大釋

諸囚公居謫十三年而返累除官皆不就前時
直言被罪者皆當擢用而公丙辰疏言金悌男
事有沮之者張公維曰荆軻雪燕之恥而求首
於生於期善道請誅爾瞻而顧惜於死悌男乎
言者乃止戊辰為大君師傅嚴立學範教訓以
小學為本每講學必引古公子得失善惡反復
盡之上愈賢之公子亦尊禮益謹仕滿當遷
上以為善於教訓不遷者五年壬申乃得遷為
戶曹佐郎正郎司僕寺僉正漢城府庶尹癸酉
登科目為侍講院文學世子家為飛語曰善道

陸有謀將不利於世子公聞之即棄去甲戌星
州以罪人鄉降為縣公為縣監有上旨極選
任之而實心忤而斥也時三南量田多怨上疏
言輕田政以寬民當事者怒公當得罪上寬
之遂謝歸不復以仕進為心丙子之亂公聞變
以為國大亂無可與計事者而江都宗社所
往諸公卿大臣多往者欲從之募鄉邑子弟出
家僮百數浮海出大洋江都數千里舟行無晝
夜甚迅至則城陷已數日南漢受圍四十餘日
命令不通或傳上已潰圍東出賊塞路公度

車駕已不可追而湖南絕遠大嶺之外以阻阨
得全急回船還至南方可以得達行在所至
海南聞車駕下城仍欲入海得小島山深水
清可居遂居焉連為司導寺正大同察訪皆不
就而臺諫論之至逮繫而實無事判義禁李德
洞曰善道居遠方聞變浮海赴亂海路絕遠縱
不及忠臣義也上特以不奔問徒配盈德周
年乃還因遨遊物外如金鎖聞簫皆海上山水
慶甲申上有疾太醫白上召之公病不赴
召上疏曰心為一身之主臟腑竅脉氣血陰陽

逆順盛衰皆係於心心安則體安風寒暑濕鬼
魅百邪無自以入心不安則反是仍論藥石攻
疾以喻治國保民不報及昭顯卒而有獄置
三王孫於濟州己丑孝宗即位時烈浚吉
以伐胡復讐動上意遂用事矣公復上疏言
修身修道仍及寬赦王孫事從縣道上之監
司李時萬不上公令其子仁義上政院政院欲
却之久而後乃上上傾心答之曰願欲親聞
讜言用事者見上意在公恐復入沮抑百計
上意欲用之三司館職而掌銓選者以為司藝

亦館職也遂除之

上特召之至都門之外上

疏請罪乞退不已

上即召公入特拜承旨令

常侍

經筵用事者益忌之又上疏力辭乞退

遂行

上以為陰計所擠令政院勉留之

特

拜禮曹叅議更陳不可冒進之意乞生還故里

又上時弊八條功臣元斗杓所為絕橫請裁抑

之以保全功臣云金自點宋時烈元斗杓各立

儻爭權點敗死杓付於時烈右斗杓者論以削

職放黜

上初既許之而即復叙時用事者方

議盡出島民沿海諸漁子于江都築諸城壘又

有量田號牌之議四方騷擾公極言不便上
罷答之而朝廷不用也島民築城事上特罷
之而移沿海諸漁子亦多議不果移丙申又應
旨進言論政弊累千言丁酉王后有疾召至
京師上特拜工曹叅議時論以為上意難
動詆毀日甚公陳情乞罷疏上政院終不納
公言其擁殺然後乃上之公請去不已上知
終不可強留乃許浚吉造誣鄭介清事至毀其
祠公又上疏極言卞白時議指為邪說白上
却之攻擊益作公遂罷明年孝宗登遐左相

沈之源啓 上召議山陵事既卜吉於水原而
時烈浚吉怒曰卜山大事不可專聽於善道遂
有改卜之事公不從則論以不敬請罪而 上
不聽公私謂曰後必有遷陵之變後十五年
山陵內崩改葬驪州前年 大行之喪 太后
當服長子三年之制而時烈浚吉執體而不正
之說又引檀弓之免于游之衰降而為期公上
疏言宗統嫡統不可歧而貳之慷慨彌切 上
持之於是皆以為語犯 先王誣陷賢者以感
怒 上心請按律 上命安置三水三水北邊

窮處古三江虛川挹婁之地後為靺鞨山澤早
寒五穀不生青江以外婆豬雜種故居王堂俞
祭者白 上焚其疏辛丑以天旱移配北青時
烈浚吉沮之亦不果移判中樞趙綱因求言

旨上劄曰善道何罪也善道之罪言宗統嫡統
為 孝廟左袒也善道獻疏之日誰為 殿下
進焚疏之策也高麗恭愍王焚李存吾之疏曩
時光海焚鄭蘊之疏國史書之野史記之曰某
朝某時焚尹善道論禮之疏為 聖朝之累何
如也綱削奪官爵公加罪圍籬安置癸卯校理

洪字遠又上疏極言宗統嫡統之說請寬釋善道字遠禁錮乙巳又因旱移配光陽亦極南海濱風土甚惡有癰瘕奇惟疾客居者十死八九後二年大旱上念其被罪積久欲釋之問于大臣皆曰可釋也惟首相洪命夏不可上特釋之公既赦出因入海行吟島濱有山中新曲漁父詞入海五年八十五公歿顯宗十二年六月十一日歸葬聞簫故里從治命云其明年復官爵後三年仁宣王后薨太王太后服妾子婦大功儒生都慎徵上疏言古禮經文不

然上覺之乃親考經文命入善道庚子論

禮疏而既焚之闕下亦不載實錄不入也及

上即位召用論禮得罪者諸臣烈安置北邊用

事者以為德源亦北邊邑安置德源後改熊川

首相積曰熊川病鄉此殺人也又改長鬐有李

有湏事烈巨濟園籬安置吉已死削奪官爵邦

禮既正當告廟頒教為積所沮不果公亦當

追爵議政積又不可降吏曹判書太常議謚曰

忠憲上之六年積敗死烈諸客復進烈復爵

位公削贈爵賜謚公峻正以積仁累義博施

利物為心曲禮小惠干名要譽為恥言不苟合
行不苟容於患難窮阨一也以直道擯斥居囚
籍前後二十年指天而正雖九死而不悔終始
一節見義不明守死不易其能此乎又考其居
家教家不失儀式尤致謹於男女之別內外之
分如曲禮內則之教為汙俗無教之警亦大矣
龍洲曰自古當興國亡國之際天必生一人守
禮死義有以警一世而教後人者有如此人云
自公入海老人號之曰海翁一時皆以呼之或
曰孤山先生孤山國東郊江上舊業其墓銘曰

比干剖心伯夷餓死屈原沉江翁窮且益堅至死不改其見義守死一也

貞夫人尹氏籍南原判書墩之女亦有婦德一門稱賢後公一年生先公十七年六十八卒墳墓舊在海上水晶之洞及葬公遷柩聞蕭長男仁義亦以多學聞有名譽公謫居三水時登第擯斥於分館禁錮十三年公死之後四年死至今上三年追爵司諫院獻納次男義義進士又其次禮義皆早歿有二女壻沈光沔李保晚又庶出男二人循義直義女三人直講李翼老

妾黃道彬楊憲稷妻仁義子爾錫上特除尼
山縣監義義子爾厚今年新補國子生貢持先
狀乞銘於老人者也

龍言別集卷之十九終

記言別集卷之二十

丘墓文

荷衣洪公墓碣銘

洪氏南陽大族其先出自唐事在唐城古事麗
時有禮史復簽書密直副使由道著於譜牒入
本朝有莊襄公師錫於公為六世祖三世有成
均司成 贈吏曹判書以平判書生僉知中樞
贈左贊成德演贊成生成均生負 贈領議政
仁祐世所稱耻齋先生者也先生娶順天金氏
前古相襄景公承澤之後而清道郡守希稷之

女也有子男二人長男進最貴謚端敏推恩
有三世封爵公為次男諱迪字太古別號養齋
又曰荷衣生六年先先生歿公幼孤而能自知
力學十八九既以才學發聞嘗讀書東湖湖堂
諸學士有酬唱作爭傳誦一時有先夫人喪與
伯氏廬於墓下朝夕饋奠必躬執供具以終三
年先先生有居業日記公慨然益自飭厲請教
於父友得動容貌斯遠暴慢正顏色斯近信出
辭氣斯遠鄙倍之戒終身誦之亦日記行事以
自省二十一宗家之嗣為後於從叔父平山都

護府使仁範府使司成公長男生貞德濬之子
而中古賢公子朱溪君深源之外孫也明年成
進士遊嶺南見李先生於陶山聞為學之要李
先生嘆之曰善乎吾友不亡矣隆慶六年別試
丙科及第補承文權知俄薦史局仍選書堂甲
戌為弘文正字侍 經筵 上問天之所以為
天以及六合之外羣臣莫對公曰學貴平實窮
高極遠恐不可 上曰天道之微何以不講修
撰金字顯曰顯微一理然人事尤切為學在下
學上達某之言是也時伯氏方為著作公力辭

居西班牙一年復入玉堂轉著作博士丁丑陞副
修撰累遷禮曹兵曹佐郎兼知製教庚辰陞
禮曹正郎辛巳移兵曹以繡衣廉問畿甸拜修
撰陞校理癸未以正言復為修撰公前後在玉
堂十年公博於經學尤善於論思稱學士全才
時兩司論劾李珣用事專恣諸言事者皆得罪
玉堂上劄曰臺諫不言珣之偏私論其事為之
失言則過矣然因事論列無一毫私也殿下
徒以珣敏捷多才謂可與興至治信乎知人則
哲帝亦難之矣上怒玉堂盡斥去公出長淵

縣監有長淵城碣誌四年以疾謝歸戊子乃叙
為兵曹正郎己丑移校理再選書堂為都堂檢
詳尋陞舍人冬以執義復為舍人其十二月所
後母金夫人歿辛卯喪制未終而公歿七月十
二日年四十三 上以前日侍從特賜賻儀一
時士莫不咨嗟悼其無命其九月某日葬于道
峯山下回龍洞艮向之原公天品頴悟既有家
庭遺教不墜早得向方又游君子之門行已有
禮立朝二十餘年當朋黨之際世道大壞公介
然特立不循俗詭隨為士類所推重鄭汝立者

初以多學拔擢一時多趨之者而公曰此人詭誕因絕之及上變事作士禍大起而公不及焉公平生好賢樂善其學自事親敬長推至於忠君善俗用力於日用人事之則而恒言不先聖人之精微可見君子之學有方有序為詩有氣格亦奇麗可誦有荷衣詩什二百二十筆法慕鍾王晚好懷素書楊蓬萊稱其才當世罕比云公初娶唐津韓氏大司憲淑之孫別坐說之女無子後娶清州韓氏贈領議政孝胤之女也聰明有孝友行通書史曉達禮義能先事審慎

不失錙銖公亦有事則必諮之敬重如良友夫
人少於公一年公歿之年十月五日夫人歿祔
葬同原生二男一女男汝翼汝亮婿姜弘勣汝
翼敦寧府都正有婿三人縣監姜壽賢士人崔
磚宗室陽寧君儼汝亮刑曹正郎有男二人有
壽有阜有阜進士有壽生景濂生負有阜生景
河景洛景洙景泗女適士人李麟徵又女一人
未嫁姜弘勣漢城府庶尹生珮婿三人舍人柳
頴進士李積監察崔毅量其銘曰

道如砥直如矢貞而確君子之履方而正君子

之止學有自是承是飭教有序是儀是式

洪教官墓表

君諱有阜字子厚荷衣洪學士之孫耻齋先生之曾孫也君少孤能讀書修行操守方正一時士皆重之二十六補國子進士上疏爭論學祭忤時議禁廢三十年至今上世除貞陵叅奉改童蒙教官時君已六十一有母之喪哀毀逾制既三年才逾月而君歿年六十三知與不知皆惜其良善無祿君善事母能以顏色養志一以順適為心兄弟同居不畜私財皆至性其

歿也又以過感與喪俱盡自耻齋先生先學士
皆持哀不勝喪而歿又有君亦可謂至行之世
重為之嘆息識之君以孝立行行已與人莫不
稱善孝為百行之源信矣

贈吏曹叅判朴公墓碣銘

穆少也拜司贍朴公於京師彰善坊館次公溫
雅有法使人起敬穆心悅之不忘未久公還嶺
南歿後四十年穆從公之季子今殿中君墮嘗
掌內侍學殿中君好古樂善則如其先人焉穆
心自語善乎司贍公賢而教子弟如此哉一日

殿中君為其王父叅判公乞銘於穆仍示其墓誌而請并載其王母蔡夫人事云云其誌曰公資稟莊嚴操履堅確少遊陶山李先生之門卒師事趙月川先生其學教於家而行於人者皆出於躬行心得之餘而嚴而有法樂而可愛穆益知司贍公家學蓋有自也司贍公當功賞之世再以前從推恩例贈公至吏曹叅判公諱養字士秀朴氏本出自新羅高麗時有諱忠佐事肅王以儒學顯於公為九世祖曾大父諱紹宗贈吏曹叅議大父諱訥昌樂道察訪

贈兵曹叅判父諱從鱗奉直郎守吏曹正郎蔡
夫人大司憲諱忱之孫成均生貞諱承先之女
夫人慈仁謹嚴叅判公治家教子弟實多內助
云當兵革之後歲大饑鬻子相食夫人取養其
宗族無依者數人以篤恩義親戚歸心享年九
十六歿子孫滿前常戒之曰人非學其猶面墻
爾曹勉之病革猶使之讀書忻然曰吾志願此
也公先夫人四十年卒有三男三女長子守謙
次守誼刑曹正郎次守謹司贍寺直長此吾所
稱司贍公者也婿三人長士人金仲熊次權直

養次黃有永子孫甚盛以至曾玄孫百餘人銘

曰

蹈德秉仁而樹之淳不發於其身以昌其後人

司贍寺直長朴公墓碣陰記

公諱守謹字景靜姓朴氏醴泉人系出咸陽高麗名臣朴忠佐十世孫也曾大父訥昌樂道察訪大父從鱗吏曹正郎父璽贈吏曹叅判母平康蔡氏大司憲忱之孫也公受學於趙月川先生簡靜少言操守有法宣祖三十九年有大臣薦之初授英陵叅奉廢主二年轉司饗

院奉事明年陞司贍寺直長又明年選司馬試
其年有大獄公以小寺例補王府假官獄事急
以捕囚不及時限罷大司憲崔有源多主文深
以此重而亦以此疾後或上疏欲傾陷崔以媚
朋黨著以公善楷書且謂公心恨崔不已欲寫
其疏公却不寫反責其陷人不可其疏者乃止
而崔聞其事心悔之以為公之賢能無宿憾於
已也公少孤事母有至性稱善行教諸子日誦
詩讀書不敢怠惰暇則習禮容樂觀書靜坐終
日雖家人子弟不召不敢前也雅好山水嘗築

臺於蘇川因以自號而鄉人號公為鼎山洞主
四十七歿生於萬曆四年十二月廿七日歿於
天啓二年十一月十七日後月葬於同郡德畧
與淑人昇平金氏同塋初娶義城金氏自如道
察訪守一之女無子後娶昇平金氏 贈判決
事德男之女先公三年而歿年四十六有四男
三女男曰瑩曰璽曰璫曰鑒璽前扶餘縣監婿
三人曰權尚達曰權估曰李世美尚達成均生
貧又有側室婿禹昌奎内外子孫三世至七十

餘人

李處士茂卿墓表

李茂卿諱晉茂初名晉高本宗室之世我恭
定王第二王子孝寧大君補之後也大父景嶸
司諫院獻納父悼以孝賢聞旌表其間者也茂
卿為後於族父盼盼父台壽義禁府都事茂卿
自少時樂從先生長者遊初見雪翁先生欣然
慕之遂為弟子終身事之方剛自守不肯循俗
媚世苟容平生好禮法慕古人直節以高尚居
漣川熊洲上無事閒暇漁釣性愛鶴養雙白鶴
三年春茂卿病胃入京求醫其九月茂卿客死

京中鶴既別主人飛去不返及茂卿歿而歸鶴
忽飛下殯門之外哀鳴良久不去客出涕曰鳥
有知其十二月葬縣南十里高子洞茂卿年七
十自號醉愚云娶南陽洪氏前古名臣忠貞公
應之後儒生順一之女也亦有婦人善行善於
舅姑嚴於祀事娠則居處必正飲食必謹曰女
節胎教不可不慎少茂卿一年先茂卿二十年
五十而歿葬於白嶽東麓茂卿歿而合葬於高
子有三男遠紀鼎紀漢紀皆讀書慎行稱善士
茂卿能教家導率之力也遠紀早歿有二婿許

潮鄭觀周翹老人之次子也今為安峽縣監茂
卿有弟晉元與之同爨而居晉元不幸短折而
無子有寡妻稚女茂卿視其衣食撫育一如其
弟時以鼎紀為後銘曰
善之無不喜過之無不規奄忽長逝而不見令
我茫然而心悲

戶曹李判書墓碑銘

判戶曹李公諱溟字子淵本宗室我太宗別
子孝寧大君補生寶城君容寶城君生栗元君
徐栗元君生呂陽君子謙呂陽君生龍岡縣令

蘄縣令生吏曹判書樑 仁順王后之舅也判
書生 贈領議政廷賓於公為皇考妣西原韓
氏左議政清川府院君伯倫之玄孫也追封貞
敬夫人夫人大家之世甚嚴家庭之內無曲恩
小惠公魁顏豐下沉毅多智寡言笑萬曆中東
方大亂天下兵皆集王城有行伍卒善相人者
見公曰貴人後日作度支事尤有難於此者矣
二十二補國子進士三十七擢大科以承文叅
外移春坊說書陞正言連在三司選知製教
光海初以御史出灣上李爾瞻尹龍灣遇之甚

善公私謂曰他日誤國者必此人瞻聞之深恨
之及為天官郎瞻為小宰薦引鄭造者為持平
公執不可瞻怒公遂不仕光海五年永昌獄起
實用事者陰主之人莫敢言其冤公為推鞠問
事囚欲發咀咒事事連大妃公叱曰天威嚴
重囚安敢亂言囚畏伏莫敢恣其所指者聞者
多之李相國德馨言王子貸死事三司論以按
法公方為應教正色曰大臣不可殺羣議譁然
怒之公卽起去先王末命托保護冲子者有
七臣鄭仁弘客姜翼文者為正言人皆曰七臣

當死翼文子大遂頗善公為言七臣無罪事以
故其事遂沮及永昌以幼稚見殺鄭公蘊上疏
極諫得罪公與鄭公素善論者以為其疏出於
公當竄卒削職歸田里後囚辭引公少子敏發
以公扶護太妃為言父子就理卒無據得釋
十年叙為舒川郡守三年陞通政尋謝歸明年
以同副承旨出為黃延道觀察使功臣李貴為
平山屏左右言舉義事公終不答及舉事遣之
一劒而已彼心悅之私語曰此大事義之所在
有從者亦有不從者謀議已成不苟從亦義也

仁祖既卽位有廢人掘地事守將得衣帶中書
書黃延方伯金吾召問公李公貴白 上言某
大義正仍極言立節昏朝狀 上雅信之不問
釋之秋特拜湖南觀察使賜弓矢以命之明年
李适叛 上南狩公陳兵迎 上於公州 上
見兵精行陣嚴肅稱善特加嘉善仍 駐駕公
州公請分軍衛 上自將一軍以伐賊軍門湮
曰城粗完大衆不可去也适既戰敗死 車駕
還京公以輜重萬餘布數千穀輸度支以需用
至天安白 上曰臣為湖省日久請從 上上

曰非卿無以鎮之仍留一年令承旨布諭南軍
俾知公竭忠報上五年奴陷兩西上幸江都
以公為京畿觀察使特加嘉義奴既退又北邊
有警改北道觀察使修器械治軍旅有壯砲別
隊始此七年為嶺南觀察使上館倭積弊請以
田賦供委積罷戰卒供輸之事上從之十一
年以警又拜北道觀察使以疾歸十二年三年
間叅判戶兵刑三曹十四年奴大入寇三日前
騎已逼王城上急入南漢以公復拜京畿觀
察使公白上曰臣嘗廡察南北諸路撫循士

卒請縋城出聚兵待南北兵皆會據險阻以為
聲勢羣議不定卒不行上還京陞資憲拜戶
曹判書謝不出亂後北路殘破大臣白上以
公遺惠在民特復拜觀察使以疾辭明年為刑
曹判書復移戶曹平物價貴出賤入數年之間
府庫充溢露積於外既與清人約成其侵責我
者日多金帛百貨輸灌於彼者不可計數而當
歲飢民急不責於民者常多歲幣粒米至萬包
公以計減十九蠲三南赴北軍布三萬五千
上稱善曰度支得人民受其惠乃至此也於是

禁防納定物貨分等以防奸盜別藏金銀貨布
累萬白 上曰急則國家賴此不細 上亦勿
輕用也十八年公已七十一以老辭 上不許
然悶其老令僚佐就私第議事特加正憲二十
三年連上疏乞免移刑曹判書尋遷拜戶曹力
辭不許不得已出視事為持平李塤所沮毀公
上疏請罪乞免或曰塤久不快於公積憾而乘
之 上不直塤公去而塤亦坎軻他日 上對
羣臣言某為戶曹能不言而財足此人才大而
恨不大用也領議政涇曰某當官盡職實為國

無他也。上亦言其盡瘁元斗杓代之初不甚相悅及見曹中事嘆曰信乎人固未易知其規模施設多人之所不及者守而勿失毋徒紛更之為也。公因風痺不利連拜京北樞府籌司皆不出。上特授典醫提調以便醫藥每臨羣臣輒問疾差劇或使太醫視之。二十六年六月公卒年七十九。上不視朝二日賜吊賻如儀。其九月葬于長湍板浮里已向之原前後二夫人宋氏梁氏之葬同原。公平生與贊成公同產業一如父母時自骨肉親愛以至貧交疏遠恩義

敦厚當事必先立其大者不顧細故尤長於治
財幣能相時量勢不喜不怒七年之間國富民
悅掌食貨者宣仁以來稱一人而已如臨民
按節之邦皆有追思碑及卒自生徒吏胥以至
賈人徒隸皆來哭失聲曰吾儕小人受公之德
惠何可忘也外而所臨諸道將校軍吏士各出
賻以為禮葬時都民哭送者以千百計返哭亦
如之其銘曰

威而能寬確而能安以剛行義景也大慮惠民
定也

宋夫人行副護軍栴壽之女生二男二女主簿
敏開府尹敏樹敏樹為伯父贊成冲之後二婿
叅議沈膺士人金震柱梁夫人部將思洪之女
贊成崔滉之外孫也生三男一女男水軍節度
使敏發郡守敏華僉正敏白敏白為完豐府院
君曙之後婿牧使閔晉亮又有側室子一男四
女男監牧敏應婿僉使具仁暨僉使李時衡金
光料崔繼蕃敏開生二男一女男周登第未仕
而歿次進士召婿監役尹端敏樹再娶而生三
男三女男郃郃郃進士郃生負婿縣令沈轍

士人鄭重遠洪聖叙轍前妻婿也重遠妻有節婦旋間敏華生一男一女男若婿士人南壽全敏白生四男三女男咸繁耆啓咸護軍耆生負婿僉正鄭載岱郡守趙渭叟士人柳世顏沈膺生二男一女男院正玖直長琬婿縣監申在敏應生二男及第裕一人幼李時衡生二男一女男及第慎及第恂婿閔璟金光烱生一女婿李時顯崔繼蕃生一男七女男幼女嫁者三人餘幼婿進士李隨沈若滓鄭度明内外子孫至三世四世百有餘人

魯淵沈公墓碣銘

公諱光洙字希聖姓沈氏國初名公青城伯德符之九世孫也青城伯六世有京畿觀察使銓觀察使生進士友俊進士生懿憲公詔為後於仲父青溪府院君友勝於公為皇考妣永嘉權氏兵曹判書徵之女也公篤信嗜學自為兒時知讀書脩行稍長成尤致力於經術光海時懿憲公連大獄竄絕域自江界遷東海之野城三千里公十六辛苦遠途時李公命俊亦連坐流海上公從而受易傳啓蒙及十年光海廢懿憲

公復顯用越五年公選司馬兩試辛未功臣李
貴崔鳴吉主元廟追尊之議公與太學四館
諸生上疏言非禮之禮曰昔漢宣帝追尊悼園
稱皇考立寢廟程子曰亂倫失禮以孫繼祖不
遠引三代於此可見也稱皇考猶且非之況列
之太廟乎哀安桓靈昏悖妄作不知所以尊親
者反陷於不孝不義云乙亥為大君師傅孝
廟潛邸時也問瞿佑新話句解公對曰為學之
要在講明義理養成德性濫誕不經之書蠱人
志慮不宜留聰明於此書也丙子有南漢之事

公從上於圍城之中賊勢既張必要王世子為質公請對言世子不可出之義因進戰守之策曰斬主和者以徇城中上既出城公入壽春從丘壑之樂名其室曰拙樂自號魯淵累除官皆不出丁亥擢拜司憲持平戊子又拜持平皆上䟽辭謝己丑孝宗卽位又以持平改春坊進善上勸戒數千言庚寅拜掌令上䟽辭以出處之義上不許時大行之喪既練禮官定行公主吉禮公上䟽論大喪婚姻之節曰朱文公議小祥後許朝請大夫以下大祥後

許中大夫以下太中大夫以上皆禪後行之公
主之貴且近豈特大夫之比哉請待三年之後
以示 殿下家法之正又有成渾李瑁從祀文
廟之疏爭論不已嶺南有偽 批事覺者自殺
而其知情者下本道按問執義趙珩等論以大
逆請鞫于 王府事將蔓大公力論治獄之體
又治以大逆不可珩等適職既大拂時議而其
事得已辛卯大旱公應 旨進抑戒衍義壬辰
又拜掌令上治道八條明體用興學校嚴內外
崇禮讓好聞過去虛名推實惠設形制凡累千

言甲午為尚衣院正尋移司僕寺正夏大水

上自責求言上䟽極言災異闕失上曰格言

令人起敬十二月懿憲公卒公居喪作家禮補解未及大祥貞敬夫人卒公連有喪已六十

上令政院問之賜藥物既三年又拜司僕寺正俄改掌令上有銜櫬之憂公上䟽言警戒仍

陳政弊上皆從之尋特拜承旨力辭不許已

亥三月大雪應旨陳體信達順之道五月

孝宗登遐顯宗卽位十一月上始開經

筵政院以公先王所尊用請侍經筵上䟽

辭之明年拜工曹叅議又上疏乞免仍陳聖學
持敬之要宋時烈宋浚吉以孝宗承大統非
長子大王大妃當服期年之制有爭論大起
公亦草疏論其失禮家有喪未及上因收議言
宗統之重因力辭適工曹後連為承旨皆不出
閉門郊居三年而卒公生於萬曆戊戌五月十
八日卒於還甲後五年五月廿一日其九月十
二日葬于廣州治東三十里退村先兆之次南
向之原今上元年筵臣白上以甘盤舊
恩贈吏曹叅判青安君公聰明博學修已有方

必先行而後言平生不喜近名之行過情之譽
忠信謹飭篤於親親謹於喪祭用力不出於日
用彞倫之則一以古人自勉見世亂屏迹自守
及孝宗卽位眷待甚厚義不可決去能敢言
正諫可謂古之遺直公已老而世道益難卷而
懷之不復用於世也其廉介之操獨行之節無
愧於古人其學自居家孝友推至於格君正俗
清而不激和而有守可謂處濁世而不亂者也
貞夫人權氏籍福州嘉山郡守慶男之孫四山
監役復吉之女儒城君柳熙緒之外孫也夫人

賢於婦德一門稱之善於祭祀賓客之禮甚得
舅姑懽心公歿後十四年正月二十八日七十
三歿祔葬同原夫人常戒子孫曰我逮事祖母
今子孫至五世六世視祖先則皆出一祖不可
以疎遠有所厚薄也子孫世守之以為家訓云
無子取兄弟之子栢為後栢 顯宗三年以

謁聖壯元官止兵曹佐郎婿別檢李震奎栢生
得震得泰婿丁載重震奎生彭齡龜齡龍齡鶴
齡麒麟齡翼齡銘曰

忠實之學篤愛之仁可以事君可以事親知微

知幾守道不貳以潔其身

完興君李公墓碣銘

公諱幼澄字澄源系出宗室曾祖

贈喜安君

輯祖

贈錦川君域父戶曹判書

贈領議政

誠中母貞敬夫人趙氏籍平壤儀賓府經歷琇

之女嘉靖四十一年十月乙亥公生夙成自為

兒時能讀書飭勵比長卓然有立篤於孝友敦

厚周惠嘗遇飢歲當食不飽一以愛物為心一

時名士大夫多推許其賢萬曆十一年我 昭

敬十六年以丙科選承文院明年薦翰林十六

年春以賀正質正還自京師陞司畜轉兵曹佐
郎知製教後年改正言十九年春由持平遷
修撰夏賜暇書堂尋移吏曹佐郎二十年三
月以校理有巡撫北邊之命時有倭寇上
將幸西京公改體相崔興源從事先行海右及
申砭兵敗擾亂車駕卽出公馳歸謁上於
沙峴遂從上西行五月為兵曹正郎轉應教
兼經筵侍講編修官尋改司諫上旣幸平
壤百官不備公常侍左右當急遽能兼攝數事
上知其賢每議事必曰非李司諫不可常不名

及賊進薄平壤 車駕當出西民亂擁 駕大

譁計不知所出公曰任方面者當受其罪卽數

之軍門誅其首亂者數人然後 車駕廼出

上臨亂旣以光海君為世子道中分百官衛卒

令鎮撫軍國戎卒數千人公前年為騎省郎嘗

一點兵卽口誦兵籍立分部伍追考本籍一人

不亂 世子遂向江東 上旣住龍灣日夜求

救於遼廣衙門得發兵明年正月克復平壤李

公恒福實主此事而計策亦多出於公李公常

以國器許之當亂初公與母夫人訣戒其諸弟

曰西幸已急先駕而圖生非忠也後駕而
徒死非孝也既奔竄不相知至此上䟽陳情乞
死生相訪上不許曰忠孝不得兩全及諸弟
幼清幼深幼沉以母夫人從間路至龍濟上
聞之甚寵賜之人以為忠孝全門二月上還
駐永柔時經略來屯關上無復進討計又不許
車駕東歸鬱鬱不快適有御史巡行東邊公往
勞之因謂曰小邦賴天子神靈社稷不亡寡君
日夜思還舊都弔死問孤無他願也經略軍威
嚴重不敢擅過慷慨言之御史許諾曰歸當以

狀奏之勉之毋失機會嘆息曰諸大夫皆賢何
患不濟於是上以龍灣事悉委之於公矣三
月以公拜義州牧兵馬節制使時衙門將士大
集日誅責萬端公處之無難凡事之係利害者
一從便宜大得民漢心雖驕將悍卒莫不相戒
慎勿犯賢節制云公與父老立約束令民口三
丁以上復二人安業民大悅上方倚公為重
公盡瘁成疾其五月晦日卒年三十二訃聞
上歎之曰父為一二臣所誤不得左右子躬天
奪良佐終始恤其家公父為諫院多直言論劾

欲中傷者乘時力擠令不容於朝故上嘆惜之如此事平行賞羣臣追賜公忠勤貞亮效節協策扈聖功臣爵至吏曹判書封完興君初葬於坡平山下李氏世葬其墓有水改葬臨津西崇禎九年以其地封長陵故還葬坡平之金谷貞夫人趙氏籍楊州藝文館檢閱擴之女嚴而有禮宗族歸心夫人少於公二歲而公歿後五十一年甲申七月廿七日歿為八十一歲長男命隆早歿次男命雄事仁考為嶺南觀察使司宰監僉正成櫟高城郡守朴遠基為

二婿而嫡孫男女四人男震奎冰庫別檢婿三人縣令宋孺悌判書睦宋善應教趙威鳳又有庶出男女六人男震譙震及皆早死三女為鄭基朴秀阜慎碩恒妻一女為兵馬節度使鄭后亮妾外孫朴遠基生四男一女男昌胤興胤良胤亨胤婿士人趙綽成櫟無子今為後者漢城府判官熙胄也銘曰

功不食勞賢不受祜天胡嗇其壽也銘功彝鼎以顯其忠為百代教首也

李觀察碑銘

公諱命雄字挺而姓李氏系出宗室我莊憲
王玄孫錦川君城生 贈議政誠中議政生完
興君幼澄完興君夫人楊州趙氏藝文館檢閱
擴之女萬曆十八年十月癸酉生公生四歲完
興君卒趙夫人賢教之如嚴父公剛毅有大節
好博觀諸家曰士讀書而不能通古今之宜明
當世之務者雖多亦奚以為公既少孤事母甚善
事諸父如事父萬曆末廢主既殺永昌閉一大
妃於西宮公歎曰人之道絕矣嘗舉進士不第
耕田以養親及 仁考反正之四年初仕為東

宮洗馬陞侍直其九月 庭試選乙科第一人
明年為正言又明年為便養乞補外為固城縣
令三年入為修撰知製 教經筵檢討官以固
城治理上賜表裏下書廢之九年有巡按關
西之 命於是朝廷有棄清北之議故有是命
時檄島軍食乏日求通貨於我而朝廷不許將
朝夕有變公至以便宜發傍邑數千斛穀以賑
之既還啓陳民情形勢及塞上積儲治兵之策
棄地之議遂止明年 章廟追尊之議起公以
獻納復入玉堂以爭論忤 上旨黜一年復召

為修撰夏以獻納遷吏曹佐郎冬陞正郎十二年春復以獻納乞養為茂長縣監十四年入為持平司諫趙綱論大臣之貪污下理時論畏忌莫肯為上言者公獨力爭又繼而有論列者上悟而釋之時金人初僭位號要我和好朝廷將遣使報之諫官多爭之者公為執義亦爭之曰中國義不可負也今媿者皆以為虜強我弱不如緩禍徐為後圖此言固近矣虜小醜倔強西北雜胡亦未盡服虜許我以兄弟舊好尚且羞辱不然一朝以無禮加我為今之計者不

知更為何策也既不早圖狃於姑息終至於國
不為國彼熐者萬死不足以贖其罪也冬虜大
舉入寇三日前鋒已薄國都急上馳入南漢
公啓上曰急輸城下積粟為戰守計朝廷方
主和事不行虜圍城相守和議益張城中無聞
志公請誅主和者以激礪將士心上以其人
初有緩敵之功不從賊日耀兵城下而無一交
鋒鬪士益怠公謂體相從事蔡裕後曰今賊遠
來疲勞不因此時決戰賊來益多食盡力屈不
亡何待君盍以此白相君乎裕後深然之卽從

其計畫購募死士戰小利城中始有戰守議及
江都敗和議遂決當出斥和者諸諫官以與虜
皆畏怯莫肯自首而事迫於世子公慷慨請
自往二月世子北行公以輔德從至高陽之
食公請於世子先從官一人前行以資行食
難其人世子顧謂曰非君莫可當賊路邑里
空虛公能出入山谷告諭吏民至遼界累千里
行李不乏上亦有旨以行中事專屬於公矣
既久在虜中每因事進戒世子亦虛心納之
至事有甚難者多所彌縫世子愈益重之夏

賞從 上勞公陞禮曹叅議冬歸有飛語 上

怒宮官在虜中縱酒多不謹先還者皆已杖流而公亦逮繫驗無實罷出明年夏乃叙為工曹叅議初有奉使者被拘久不歸至則 世子臨行上謁諸從官皆曰彼習於虜者也請與俱徃公私謂弼善閔應協曰君亦此言者耶後必悔公能竭力深念與人必忠驅馳於患難之際災害不及焉秋改承旨兼 經筵叅贊官時大饑公白 上廣出告身募富人粟以賑之冬 上命立溫祚祠於南漢功臣李曙以築城功多令

配食同室公曰曙於溫王雖異代之君臣膺之同室則非禮也 上從之明年春以大司諫移副提學上疏辭之尋出為嶺南觀察使又以母老乞辭 上不許賜弓矢以獎之初安東士人有金是樞者上疏言山城事禦留城在嶺南境上最據險云及公出嶺南 上以此屬之公至界卽以形勢具聞大臣請令審擇地利以為南方保障公行見諸名城關防要害皆莫如架山其九月大發軍伍徭戶遊丁凡十餘萬人至明年四月城既完請割傍數郡之地設邑欲移營

鎮之朝廷不許而只割星州一縣置叅谷都護府時列邑解弛紊亂無紀公一切繩之雖舊交大官無所倣借其不從令甚者黜之以故不悅者衆及叅大臣以為築城事重請毋代而嫉之者以役民多怨論劾公亦上疏引咎自劾七月復入政院前日因慶大赦徒流以下以輕宥羅萬甲事未謝而罷公嘗議均田大同二法與大臣論難於上前上善之公請以大同法先行於嶺南公去而竟不行其十二月復為禮曹叅議以母老上疏乞郡明年春為洪州一年邑大

治自喪亂來恨當時事已無可為而嘗語人曰
我世臣也不可去也既在其職當盡其職鍊戎
卒治器械未嘗一日忘北首也二十年正月廿
六日卒於官年五十三訃聞上曰盡瘁王事
死於官守對羣臣嗟嘆言之其三月歸葬坡平
公堅嚴見事明能善謀而善成好規人之失而
未嘗對人言其過雖在朋黨睽乖之世無一異
陰陽而左右之賢愚皆得其誠心偏裨將校之
屬皆量才而使之各盡其能及卒遠近來哭者
如悲親戚二十一年嶺南觀察使林墀周覽營

壘嘆其奇才而反被讒詬具上築城疇畫形勝
請追行爵賞 上嘉之 贈公吏曹判書封完
陽君貞夫人柳氏籍全州父清道郡守諱稿以
直道著聞夫人亦以婦德一門稱賢後公二十
三年七十三而卒甲辰十二月廿七日也合葬
坡平生三女一男婿三人縣令宋孺悌判書睦
來善應教趙威鳳男曰震奎冰庫別檢又有側
室子男女六人男曰震謙震及婿三人鄭基朴
秀阜慎碩恒一女為兵使鄭后亮妾孫震奎有
子六人彭齡龜齡龍齡鶴齡鴻齡翼齡外孫宋

孺悌三女其婿權觀睦天和沈羲圖二男世載
世憲趙威鳳一女婿李允迪銘曰
兼而能讓人之望也威而能恕人之譽也

李別檢墓表

君諱震奎字文休姓李氏我世宗七世孫而
完興君幼澄之孫完陽君命雄之子也母全州
柳氏清道郡守縉之女也明顯皇帝萬曆四
十七年十二月戊寅君生祖母趙夫人甚愛育
之常飲食得一佳味必先於君及君始有知不
先父母不食趙夫人益奇之莫之違也號曰孝

兒崇禎四年完陽君乞郡為固城及召還君
年始十二能幹行事完陽君喜曰自此吾有兒
既就學文藝日將沈承旨光洙愛其為人以女
妻之壬午完陽君卒於洪州君持喪有禮人皆
曰善居喪家貧事母能色養堂叔父命著稱之
曰孝子之愉色事死如事生吾於此人見之矣
君平生口不言人是非不喜交結為名自守以
篤其行師事觀雪先生先生歿為之服師之服
己亥以行誼除靖陵叅奉甲辰又除冰庫別
檢其年柳夫人患風痺病君晝夜不離側數月

柳夫人歿自完陽君歿繼而趙夫人歿君持喪
六年毀感因多病又柳夫人歿既殯君死乙巳
正月廿四日年四十七吾聞天道福善禍淫君
行出乎古人無祿而不見何也所謂天之道信
耶非耶孺人沈氏事舅姑有至性一順君意一
門稱賢先五年四十一歿卜地不吉寓葬牛嶺
今合葬之墓在坡平完陽君墓下有六男彭齡
龜齡龍齡鶴齡鴻齡翼齡彭齡早歿銘曰
嗚呼以君之多才多藝沒而著而諸子之棟棟
天之將厚報於其世耶

木翁宋先生墓碣銘

先生諱瑄字仲懷姓宋氏本礪良人高麗僉議
中贊松禮之後也中贊九世有掌令好義顯於我
中宗世為聞人掌令生修義副尉檜副尉生百
祥於先生為曾大父大父父三世母金氏籍安
東正言鉞之女也先生少受業於順川都正既
篤信修行後遊暢庵幸村之門博聞君子之學
我宣祖九年初仕為繕工監役後六年選用
庶謹吏先生擢拜司饗主簿明年為果川縣監
十八年為抱川縣監田政不治豪右兼并成風

小民苦之先生一繩之以法右族多不悅治縣
三月罷百姓立遺愛碑後年為江陰縣監一年
為司憲監察二十一年為雲峯縣監明年有大
獄所謂已丑獄者也及兩李連死人心大懼莫
敢有相顧之者而先生躬視殮一不以禍故相
負也卒以與罪人親善得罪罷二十六年為唐
津縣監當兵革之後飢饉仍之先生躬自薄以
給民所全活甚多百姓稱之曰後世必有天道
之報及謝去歸多流涕思之二十九年拜翊衛改
戶曹佐郎一年以典牲主簿改刑曹陞正郎尋

拜載寧郡守三十六年為軍器僉正後以軍資
僉正為谷山郡守二年復為翊衛時先生已六
十三憲令世子出則翊衛執寶光海為世子素
聞其賢心敬之每出必使小宦執寶出宮門之
外明年為丹陽郡守光海五年為利川都護府
使辭以老不入都門十年卜居開天從山水之
樂其溪上亭曰養志之亭日閑暇自娛別號曰
木翁 仁祖反正之年以大年有白 上者加
通政後五年避亂於清風寓居水村七年而歿
先生生於嘉靖二十三年五月六日歿於崇禎

二年四月一日春秋八十六後月歸葬楊州妙寂山下族葬之次先生天資篤厚行誼方嚴其問學之正踐履之常皆可以矜式後人先生二十一先府君歿五十八先夫人歿既葬皆守墓三年然後返忌日必黻巾素服悲慕不衰以為終身之喪檢身有法制行有禮既篤於孝悌以親親為本推及九族教子孫必有義方一門之內忠愛無間至於僕隸下賤亦必推恕而主恩與人交恭敬信讓見善而喜若已有之聞過而規若耻之在已也歷仕三朝為郡縣八守法廉

平無一循俗苟私以故未嘗久於官也所與友者如韓久庵百謙洪晚全可臣權寺正用中洪叅判履祥德信公子金翠屏昌一康竹礪復誠禹東溪伏龍許留守潜或以道學或以賢能皆時之聞人初與晚全公共師事幸村先生以古人之學相推許云夫人李氏籍載寧別提衡之女克順婦道先生十年七十八歿葬在同原有一男三女男時保陰城縣監婿三人別提丁彦璿縣監金怡觀察丁好善孫時保五男一女男孺孝孺悌孺信孺敬孺徵孺悌縣令婿直長

姜聖期外孫丁彥璿二男一女男時高時說婿
李惟清丁好善二男二女男弼善彥璿獻納彥
璧二婿承旨安獻徵判書具挺一子孫至三世
四世百餘人先生於書老而益勤論著古人之
奧尤致力於禮學後家失火書皆不傳銘曰
安而利出處有義確而貞守道不貳嗚呼敦且
淳儀式後人

壺山君宋公墓碑

仁祖功臣壺山君宋公諱時范字希文其先本
礪良人曾祖 贈左通禮檢祖 贈左承旨延

福父

贈礪興君珽母

贈貞夫人李氏籍全

州判官元常之女宋氏三世封贈皆以公貴也

皇明萬曆七年我

昭敬十二年十一月七日

公生生八歲受孝經大學又能書客有求書者
特大書孝悌忠信客試之曰兒無他學長則以
此四字應主司乎曰豈特應主司而已事君澤
物皆此四者客嘆奇之性聰明善記誦志落落
不屑屑為名嘗為親應舉累選公車及父歿仍
不應舉力作以供母膂力絕人以選初授宣傳
官心不肯曰讀書不成名執戟侍陞楯可羞時

北邊多事選才勇李相國恒福薦於上上特
賜弓矢孫吳兵法以獎之戊申登武科未得仕
母歿既三年復為宣傳官仍選籌司郎方光海
政亂卽棄歸太后廢時諸爭臣皆得罪公上
疏極言為中書官所沮去後有大臣知其賢選
以不次累官至訓鍊院副正終不就仁祖潛
邸時遇公懽與語如平生大喜得人以書托李
曙四斯人者智勇過人可與任屬大事曙素善
公自此愈益重之及癸亥舉大義公將甲卒功
力居多上特進階為別將令直禁中上既

與奴絕和親選邊守公為郭山郡守上送之
曰勉為之尋移雲山郡守特加嘉善寵用之時
副元帥适已陰有叛謀上遣繡衣使者行邊
邑有一賜書公受書即以單騎至适軍留宿不
見适而返人莫知何事也至熙川暴卒十一月
十八日年四十五訃聞上大驚悼遣禮官賜
之祭特令省司送其喪明年正月适舉兵叛
喪至金郊驛适大掠而過其二月以禮葬楊州
之妙寂山下先珽之次四月追賜奮忠贊謨
靖社功臣號爵兵曹判書封壺山君妻崔氏

為貞夫人公無子上命立後母令絕祀也八月又特祭之仍厚賜恤其家公早失父母有姊妹四人皆寡居無所依公均其臧獲必薄取而厚奉給性敦厚慎重一不以侮慢加人能恤人之急如嗜欲慕義無窮崔夫人籍海州禮賓參奉駙之女也有至性公歿哀毀自苦不食鹽醬哭之如初喪三年八十四歿孝宗九年正月廿六日也三月祔葬同原所後子孺敬於公為族昆弟之子而故利川都護府使瑄之孫亦名人之世也生二男二女男世甲世貞長女適宗

室瀛昌君沉其次未嫁銘曰

力如虎勇如羆持下執雌大邦之桀知遇 聖
哲戲難克憖戎臣之烈勒功彝鼎垂耀百代名
不可蔑

慈山先生墓碣

先生姓鄭氏諱彥嘗字宇容父本百濟之湯井
人少博讀書為文章名於 明宣之際其文驕
而輿肆而聲牙抑揚長於諷本之屈原參之子
雲相如韓柳氏而成一家松川梁應昌稱之曰
千古絕才後千載無此作車太常天輅註萬人

坑人爭讀之膾炙於時萬曆中國子試獻玉貌
篇擢為壯元號為鄭玉貌云於是其名滿一世
性高抗無媚世氣忤權貴人陷危危必致之死
而從獄中上書自辨縱得釋猶排擯之不已坎
壈不得意沒於窮途命也終其身窮抑無聊不
改所守節操愈堅教授生徒號為慈山先生屈
原怨而思子雲相如嬖而媚班固艱退之平子
厚苦蓋楚古漢麗唐變古而為排者也先生集
諸家為騷學三體行於世先生生於明嘉靖二
十四年沒於萬曆四十年年七十八先生無子

穆二三十時與鄭希聖奉壁同學於先生穆學
戴記檀弓古經二子皆學文章者也今先生沒
將六十甲子當時從遊士皆亡穆以八十在世
洎吉辰既修墓立碣墓前者前坡州牧使鄭東
高儒生奉千秋實奉鄭氏二家子弟也并識之

朴松堂先生碣銘

丁巳

先生姓朴氏其先本密陽人松堂別號也曾祖
左贊成好問祖安東大都護府使哲孫父吏曹
叅判壽宗母貞夫人李氏我恭定王之孫也
父讓寧大君初立為世子我莊憲王在諸王

子有聖德乃佯狂以讓之國人擬之太伯虞仲者也憲宗成化七年辛卯先生生自為兒時偉然異凡兒父叅判公命名曰英字曰子實生五年叅判公卒七年母貞夫人卒十年祖母淑夫人卒未卒喪祖父安東公又卒先生十二持重喪居廬既三年習騎射十六七已勇力聞二十一從元帥李克均虔州之後其明年壬子以武選居列士三年甲寅我康靖王薨嗣立君是為廢王先生知政亂即去歸鄉里居洛水之上與當世名儒鄭鵬朴耕交遊為師友從鄭氏講

大學經傳學既通遠近皆師之我 恭僖王四年除宣傳官不仕明年庚午三浦倭叛大發兵討之公特拜助防將出昌原既事平仍不復仕居三年拜黃礪縣監三年政成擢拜江界都護府使又三年以治理移義州牧使未赴召拜同副承旨轉至左承旨己卯陞拜兵曹叅判時趙光祖等以經術進陳治道皆三代古事一時士多趨之者而小人多疾之先生心憂之即謝病歸其夏賀聖節朝京師冬復命光祖等皆被罪而光祖竟賜死先生降資在西樞仍為金海都

護府使一年於是良善皆斥先生亦削職還鄉其冬有誣告事以為與東都尹柳仁淑謀去用事者召問王府論死先生慷慨爭卜極言無事狀其誣告者反坐而先生得釋居洛上十六年杜門不出專事修學學者稱之曰松堂先生及用事者敗上復召用良善先生為嶺南左節度使三年庚子先生卒年七十葬于同府二十里官洞初鄭鵬朴耕來見先生鄭氏指冷山問曰山外何物先主不荅後復問子知山外何物乎先生曰山外亦前山鄭氏忻然喜之先生嘗

著晦庵白鹿洞規解五教學序修身處事接物
五篇自人倫之本推之於道之一貫以極為邦
之術三代損益其文二十四貞夫人李氏都承
旨世匡之女生居易國子上舍居易生敦復敦
仁敦復生貞敦仁典牲署叅奉婿二人士人金
昌鳳進士南守正敦仁孫敬祉官至左尹又有
外孫李汝發為諸道節度使入為御營大將封
韓興君皆以廉直稱先生二十六始發憤讀書
既積學而通以自得為宗傍通素問難經善治
四方風土奇恠疾至今南方之醫傳誦色相之

言方集卷之三
三十七
變善州自古稱多豪傑之士金澍吉再金淑滋
金宗直李孟專鄭鵬河緯地七人及先生金鰲
有先生遺祠黃磡縣亦立祠以祀之其銘曰
括人其巍君子之表高蹈卓立離世俗之擾擾
遊無窮入奧妙貫天人之教

許相國碑陰記

戊午

公諱頊字公慎本陽川人
世祖名臣忠貞公
琮四世孫也沉厚寡言臨事慎重自初出身久
居館職不甚知名累為郡邑以治行稱辛卯為
公州牧使仍陞湖西觀察使當壬辰大亂兩湖

幸被兵最後行朝隔遠賊塞路公能治兵阻阨
以為聲勢通漕運給軍餉不絕致力居多師旅
之餘國大飢人相殺食公受命入中國請賑得
山東粟二萬二千七百以賑東民丙申復出為
江界都護府使得吏民心監司上治績曰庶以
行已寬以臨民府在古靺鞨南為賊路之衝

上特移授義州府尹仍擢拜關西觀察使及於
上召拜兵曹叅判時日本倭媾和會群臣合議
公曰此不可上聞於大國壬辰大國許和而我
以不從故也尋陞漢城府判尹改戶曹判書丙

午以吏曹判書拜右相陞左相胡酋奴兒哈赤
擊破忽刺溫北邊騷動以公為兵馬都體察使
以備胡戊申上登遐三司告臨海君肆謀叛
時鄭仁弘上疏罪狀領相柳永慶領相謝病不
敢出公奉世子即日登大位於行宮永慶安置
慶興公謝病乞免三司論頊以三公黨惡亂政
廢主曰左相重厚謹慎豈有此事三司連啓罷
相乃止初上疾彌留領相將行禱於山川公
曰有王世子在大臣不可主此事以故柳氏
敗而公得免於禍公出居西湖有掌令李籲言

項通賓客妄論朝政人心大懼不敢相問公居西湖十年自同村翁野老言不及時事自號負暄有申景禧者誣告大獄公辭連付處原州卒年七十歸葬禹勤後六年仁祖克大難光海廢而大釋諸囚公追復官爵公至孝居父母喪啜粥哭居廬三年有季父馮年八十一以事父者事之又推仁於宗族交友莫不曰賢平生以謙慎廉謹四者自勉自居家以至立朝事君皆以此四者其教蓋質信無誇可謂不言而躬行者也

李正郎墓誌銘

公諱幼清字清源系出國族高祖江陽君瀟我
莊憲大王之親孫以桂陽君璿之中子為叔父
潭陽君璩之後者也曾祖喜安君輯祖錦川君
璩好學篤行有賢者之德與高士李仲虎張倫
齊名為友父誠中宣祖世為戶曹判書以長
子幼澄有功封賞追爵領議政封完昌府院君
母平壤趙氏儀賓經歷琇之女公為人寬而能
嚴見之儼然有長者軌度平生不為苟難以為
名嘗累舉不中以門地初仕為造紙署別提時

上幸龍灣遼左兵大集公以選接伴劉貢外心
敬之明年天兵克平壤回下兵嶺南先相公判
戶曹管饋餉其七月至咸昌病卒既卒喪之後
年以東宮衛率出木川縣監有上司因狠忤辱
之與隣郡太守李基高徐恩遠皆棄官歸連為
大興積城當大亂之後推其常俸之餘以給親
戚之無依歸者事聞上賢之特賜表裏以賞
之陞金浦縣令三年移龍岡三月解官歸父老
遮道願留戊申光海即位而自兵革來國無常
賦民不堪有大臣設宣惠法以公為郎明年因

為戶曹佐郎壬子出義興縣監時光海政亂及
叅挈家入原州不復求仕太夫人年高與其弟
幼深耕釣以養之四年太夫人歿既三年則
仁祖反正之元年也為戶曹正郎將大用朝廷
立大同法均行諸道公復為郎以便宜条列凡
十事欲上時大臣稱病公知事不行遂決意謝
而未去明年二月李适叛入京城公病篤舟行
至興原歿公善父母兄弟死而孤寡無依者視
之如親子嘗與人絕而終身不出其惡嘗為縣
邑以治理稱循法而便民不為姑息少利有古

良吏風生於我 宣祖即位之元年五月四日歿
於 仁祖反正之明年二月二十三日年五十
七淑人宋氏駙馬礪城君寅之曾孫僉知樞府
圻之女性不喜奢華一於順適以承公之志少
於公一歲八十三歿與合葬之墓在坡平西李
氏族葬生四女一男一男一女早死婿三人
仁祖功臣沈命世士人趙元老趙欽沈命世趙
元老無子今皆有所後子曰果川縣監沈樞
獻陵叅奉趙演趙欽有子男女七人男二人曰
趙以乾趙仁乾公無子今為後者其從子命著

命著有子男女四人男曰震徽銘曰
吾不知厚賦而薄試天之施耶

俞正李公墓碣銘

公諱慶恒字士常姓李氏其先本羽溪人始祖
球八元登制科仕高麗官至禮賓卿同正後世
有疑太祖功臣事在國史五世有同敦寧之
芳將邊兵擊胡以功貴同敦寧生叅判光軾叅
判注大司憲戡大司憲生注書成憲注書生宣
務郎吉男宣務郎生公母鄭氏關西道都事或
之女光廟相麟趾之四世孫也萬曆二十九

年正月十二日公生才聰明善記誦受學於疎庵任學士叔英始知名十九選博士弟子二十七以明經擢乙科及第補成均學諭明年陞典籍方朋黨成風舉世爭趨而公好直諒不肯循俗詭隨蹭蹬不為意歷司憲府監察刑曹工曹佐郎正郎軍器寺司僕寺僉正宗廟署令補外新溪縣令禮安結城縣監嶺南北關都事或曰舉世爭名逐勢得之者皆是何不優遊取容斥落若是公曰性不能亦不欲也壬午先夫人歿公哀毀積疾明年癸未歿年四十三公仁孝篤

厚事父母必承意順適一以父母心為心每為
官遠途或不赴或赴而去歸未嘗久於官者皆
為親老故也有伯母臨年寡獨公事之如事母
其從兄已亡而有庶出女飢寒困苦者二人皆
資而嫁之凡親戚之貧無依者亦皆撫恤不怠
至性如此恭謹儉約居官二十年淡然如寒士
不喜玩好樂觀書無事手不釋卷以宣務公耄
年在堂公歿而恨不得終養至於垂絕猶屢言
不盡言皆此事也淑人李氏 太宗別子孝寧
大君補之七世孫也父湖西水軍節度使慶裕

大父溫陽郡守幹曾大父豐德郡守光胤母朴氏秉節校尉文佐之女淑人善事舅姑姑鄭夫人稱之曰吾婦至誠事我婉容二十年婢僕有過從容責諭曰善楚非婦人事也有一婢為庶出弟所私畜生子數人而貧不能贖即成券以與之隣里有假貸資無吝色亦不責其償天性仁厚類此淑人長於公一年六十七歿公初葬於廣州治南台藏畢先塋之次至是改葬同州彥州里同敦寧墓在岡淑人祔于左有三男二女男德雨嘉雨嘉雨有茂才不幸無命瑞雨文

科婿尹得說監司李瑞圭進士其銘曰

恭謹者德之本儉約者福之門善積者行淳福
厚者理惇天道之報可必於後昆

記言別集卷之二十終



